



Il president communal Marcus Beer ei vegnius reelegius 2025 per quater onns sco president communal. Ussa vul el far la damonda da confidenza al parlament dad Ilanz/Glion.

FOTO LIVIA MAUERHOFER/SOMEDIA

Il parlament dad Ilanz/Glion sa buca decider

Ils 18 da fevrer 2026 vul Marcus Beer, il president communal da Glion, tschentar la damonda da confidenza al parlament da Glion. Il motiv ei in video che muossa il president communal en cumpurtament emoziunal a sevilond sils petiziunaris che han vuliu surdar lur petiziun per pagar ils parcadis cun muneida. Il president seperstgisa ed ei sin giavisch dil parlament communal promts d'abdicar.

MARTIN GABRIEL/FMR

Il video che muossa il president communal da Glion *Marcus Beer* a sevilond sillas representantas e sils representants dalla petiziun per pagar ils parcadis cun daners bluts ei vegnius transportaus via medias per l'entira Svizra entuorn. Ier mardis endamaun ha ina communicaziun dalla Casa Cumin da Glion contonschiu las medias. Speditur da quella ei il president communal Marcus Beer che seperstgisa. El hagi buca giu sut controlla sesez duront la surdada dalla petiziun. «Igl ei buca reussiu a mi en quei mument da satisfar a mia rolla sco president communal», scriva Marcus Beer ella communicaziun. Ed el fa da saver ch'el vegli tschentar la damonda da confidenza al parlament communal che seraduni en in'jamna ils 18 da fevrer 2026 tier sia emprema sesida dalla nova legislatura.

La basa legala maunca

Sco sin palancau federal e cantunal stat ei era a Glion scret negliu ella lescha dil parlament communal che quel seigi cumpetents da tractar ina damonda da confidenza dalla suprastanza ni d'in singul commember dalla suprastanza communal. Era *Damian Manser* digl Uffeci da vischnauncas dil Grischun confirmescha che la damonda da confidenza che Marcus Beer vegli tschentar al parlament Ilanz/Glion hagi negina basa legala el senn d'ina damonda uffiziala sco en autras tiaras. Cheu se tracti ei plitost d'ina damonda politica, di Damian Manser. «Igl ei ina damonda politica e buca ina damonda giuridica, sch'in president communal vul constatar, sch'el ei aunc acceptaus en siu uffeci ni buca.»

Negin connex instituziunal

Andreas Glaser ei professor da dretg en plirs roms all'universitad da Turitg. El ei expert dil dretg public e meina era il Centre for Research on Direct Democracy en il Center per Democrazia ad Aarau (CPD). El ch'enconuscha fetg bein la Surselva e sias instituziuns di, ch'ins sappi sedumandar, sch'il parlament dad Ilanz/Glion astgi insumma tractar quella «damonda da confidenza». Sil nivel communal detti ei negin connex instituziunal denter parlament e suprastanza. «Jeu dubetel denton ch'ins astga insumma far in tala damonda. Il parlament vess en mintga cass il bien dretg da refusar da s'exprimer en quella caussa. Il parlament savess refusar d'entrar ella discussiun. Sch'il par-

«Jeu dubetel ch'ins astga insumma far ina tala damonda. Il parlament vess en mintga cass il bien dretg da refusar da s'exprimer en quella caussa.»

Andreas Glaser, professor da dretg ed expert dil dretg public all'Universitad da Turitg

lament vul propi exprimer siu sustegn, san ins probablamein buca scumandar quei.»

Quei dat ei buc tier nus

Tenor il professor da dretg *Andreas Glaser* exista la damonda da confidenza en systems parlamentars. En Svizra detti ei buca la damonda da confidenza, gnanc sin nivel federal nua che la regenza vegn eligida dil parlament. «Els cantuns ei la damonda da confidenza aunc pli disfuncziunala, perquei che la regenza vegn eligida dil pievel.» En certs cantuns, per exempel el Grischun, dat ei tenor *Andreas Glaser* sil nivel cantunal in instrument correspundent, denton vice versa alla damonda da confidenza. «Il Cussegl grond sa realisar ina procedura da destituziun encunter in singul commember dalla Regenza ed aschia allontanar la persuna ord igl uffeci. In commember dalla Regenza sa denton buca tschentar la damonda dad el anora. Il Cussegl grond sto iniziar la procedura.»

Negina tractanda

Il niev parlament dad Ilanz/Glion seraduna la proxima mesjamna tier sia emprema sesida dalla legislatura nova. Igl anteriur president dil parlament *Daniel Candinas* di che tenor el sappi il parlament buca votar ils 18 da fevrer 2026 sur d'ina damonda da confidenza dil president communal. Quei seigi era buca tractandau e las tractandas dalla proxima sesida seigien gia publicadas, di *Daniel Candinas*. «Tractandas dil parlament san tenor mia capientscha mo parlamentaris ni parlamentararis pretendere.»

Negina decisiun

Flavio Elvedi da Glion entra en uffeci ils 18 da fevrer 2026 sco niev president dil parlament e successur da *Daniel Candinas*. Pertuccont la damonda da confidenza dil president communal vegni el a tschercar il discuors cun Marcus Beer avon la sesida dil parlament. «La basa legala ei buca dada per che nus sco parlament sappien prender ina decisiun en quella caussa», di *Flavio Elvedi*.

Pigl expert da dretg public e professor da dretg alla Universitad da Turitg *Andreas Glaser* dat mo ina alternativa alla damonda da confidenza. «La suletta alternativa per Marcus Beer fuss da demissionar e da candidar puspei en ina elecziun complementara. Tras la demission savess el dar al pievel da Glion, sco tgierp electoral, la pusevelidad da s'exprimer davart la confidenza en el.»

LUMBREIN

Asa Hendry prelegia

Il settember 2025 ha la Chasa Editura Rumantscha publicau il niev cudisch «archiv» dad *Asa Hendry*. Gievgia, ils 26 da fevrer 2026, sededichescha la Casa d'Angel a quel. La menadra dalla casa editura, *Nadina Derungs*, presenta l'ovra, Asa Hendry prelegia ed ei suonda in discuors. Musicalmeins accumpogna *Leander Albin* l'occurrer. Il cudisch da 68 paginas ei in text per in teater. Igl ei in monolog che tracta las tematicas famiglia, cuntrada muntagnarda e traumas che van sur generaziuns. Cun quella ovra ha Asa Hendry gudignau 2021 il Premi grischun da litteratura. El center dil monolog ei il raquintader che raquenta da sia relaziun cul bab, ina persuna da paucs plaid. En in monolog insistent intervegnan lecturas e lecturs il connex cul tetel dil cudisch: Numnadamein co la persuna che raquenta conserva la suletta historia da siu bab. Ella sezza ei igl «archiv» dil bab. (fmr/abc)



Asa Hendry, a caschun dil Premi Travers a Zuoz.

FOTO MAD

La prelecziun cun Asa Hendry ella Casa d'Angel a Lumbrein ei gievgia, ils 26 da fevrer 2026, allas 17.30.

GLION

Discussiun davart lenna e la sanadad dils uauls

«Tgei fa lenn cun mei e co vai cun nos uauls?» – Quellas ed aunc biaras autras damondas vegnan discussiunadas la gievgia sera ils 12 da fevrer 2026 el spazi da d'art e cultura «Zezzaneera» a Glion. Quei tenor ina communicaziun da medias dil venderdis vargau.

Alla runda da discussiun separticipeschan igl architect e fotograf da Vella *Sandro Livio Straube*, il mistergner *Thomas Florin* da Valendau e *Beat Brunner*, inschignier forestal da Dietikon.

L'occurrer che vegn moderada da *Bea König* fa part dalla exposiziun actuala ella Zezzaneera «Lenn – Holz», nua che ins sa contemplar fotografias da *Sandro Livio Straube* e hochers da lenn construi da *Thomas Florin*. (cdm/fmr)



La fotografia «Ogna» digl architect Sandro Livio Straube.

FOTO SANDRO LIVIO STRAUBE

La discussiun entscheiva allas 19.30, l'entrada cuosta 15 francs. La bar ei aviarta naven dallas 18.30. Reservaziuns sin info@zezzaneera.ch.

inserat

